

UMS Link, RTM rangka usaha sama perkenal kursus penyiaran, dokumentasi

NST 03-12-2011 10

KOTA KINABALU: Universiti Malaysia Sabah (UMS) melalui syarikat milik penuhnya UMS Link merancang untuk memperkenalkan kursus kemahiran media meliputi penyiaran, komunikasi, rakaman dan penggambaran dengan kerjasama Jabatan Penyiaran Malaysia (JPM).

Pengarah Eksekutif UMS Link, Prof Dr Roselina Ahmad Shaufi berkata setakat ini kursus-kursus seumpama itu banyak ditawarkan di Akademi Seni Budaya dan Warisan Kebangsaan (ASWARA) di Kuala Lumpur, sebuah institusi pengajian tinggi di bawah JPM.

"Kita melihat terdapat permintaan besar di Sabah terhadap kursus-kursus berkaitan kemahiran penyiaran, komunikasi, rakaman, penggambaran, dokumentasi dan seumpamanya.

"Oleh itu sebagai institusi akademik, UMS Link berperanan membuka peluang-peluang pembelajaran berkaitan bidang-bidang berkaitan dengan usahasama tenaga berkemahiran dan berpengalaman RTM Sabah," katanya.

Beliau berkata demikian dalam sidang akhbar selepas majlis penyampaian sumbangan jersi bola sepak berjenama kepada kontinjen RTM Sabah yang akan berangkat ke Melaka bagi membawa cabaran ke Sukan RTM Semalaysia 2 hingga 8 Disember bertempat di Politeknik Merlimau.

Turut hadir menyempurnakan penyampaian sumbangan itu ialah Pengerusi Eksekutif UMS Link, Datuk

K.Y. Mustapha. Sumbangan diterima oleh Penolong Pengarah Siaran Sabah Vfm, Jaafar Jaidin.

Dr Roselina berkata, pihak UMS mampu menyediakan tenaga akademik dalam bidang-bidang berkenaan sementara pihak RTM Sabah boleh memanfaatkan tenaga berpengalaman dan berkemahiran tinggi mereka secara bersama untuk melaksanakan kursus-kursus berkaitan penyiaran, komunikasi, rakaman, dokumentasi dan penggambaran.

"Pengetahuan secara teoritikal dapat diberikan oleh kalangan ahli akademik di UMS sementara selok-belok kemahiran teknikal sudah pasti akan dapat diberikan oleh kalangan kerabat kerja dari RTM.

"Jika kita gabungkan teori dan kemahiran itu, kita memiliki kekuatan

untuk memenuhi keperluan bagi melaksanakan kursus-kursus yang berkaitan," katanya.


Katanya lagi, kursus-kursus berkenaan boleh dijalankan secara jangka pendek dengan tauliah yang diiktiraf.

Terdahulu itu ketika berucap, Jaafar berkata pihak RTM bersedia menjalin kerjasama untuk melaksanakan program-program yang dapat meningkatkan penyebaran ilmu dan pengetahuan kepada masyarakat.

Kontinjen RTM Sabah yang terdiri daripada 90 atlet akan bersaing dalam 11 acara sukan yang dipertandingkan seperti bola sepak, takraw, badminton, bola tampar, boling, dart, catur, bola jaring, futsal, karom dan ping pong. -OLEH MARRYAN RAZAN (marryan@newsabahtimes.com.my)



SUMBANGAN ... Jaafar bagi pihak kontinjen RTM Sabah menerima jersi bola sepak sumbangan UMS Link yang disampaikan oleh KY Mustapha sambil diperhatikan Dr Roselina.



RANGKA KERJASAMA ... KY Mustapha berkongsi sesuatu fakta mengenai usaha sama yang boleh dijalankan bersama UMS Link dan RTM.